

Yesu Aliye Vyote Kwetu

Bali kwa yeye ninyi mmepata kuwa katika Kristo Yesu, aliyefanywa kwetu hekima itokayo kwa Mungu, na haki, na utakatifu, na ukombozi—

1 Wakorintho 1:30.

Ni ukuaji katika kuijua tabia ya Yesu ambao unaitakasa nafsi. Kutambua na kuikubali kazi ya pekee ya upatanisho humbadilisha yule autafakariye mpango wa ukombozi. Kwa kumtazama Kristo anabadilishwa katika mfano uo huo, toka utukufu hata utukufu, kama kwa Roho wa Bwana. Kumtazama Yesu kunakuwa mchakato uadilishao na utakasao... Ukamilifu wa tabia ya Kristo ni hamasa ya Mkristo.... Yesu kamwe hapaswi kuondoka moyoni. Malaika wanasema juu Yake, “nawe utamwita jina lake Yesu, maana, yeye ndiye atakayewaokoa watu wake na dhambi zao” (Mathayo 1:21). Yesu, Mwokozi wa thamani! Uhakikisho, msaada kamili, ulinzi na amani vyote vi ndani Yake. Ni mwondoaji wa mashaka yetu, uthabiti wa matumaini yetu yote. Linapendeza jinsi gani wazo kwamba tunaweza kuwa washirika wa asili ya Mungu, ambapo tunaweza kushinda kama alivyoshinda Yesu! Yesu ni ukamilifu wa matarajio yetu. Yeye ni tuni ya nyimbo zetu, kivuli cha mwamba imara katika dhoruba. Yeye ni haki yetu, utakaso wetu na ukombozi wetu.

Nguvu ya Yesu inapaswa kuwa faraja, tumaini, taji ya furaha, ya kila mmoja ambaye anamfuata Yesu katika pambano lake, katika mahangaiko ya maisha yake. Yeye ambaye humfuata kweli Mwana-Kondoo wa Mungu aichukuaye dhambi ya ulimwengu, anaweza kupaza sauti kadiri anavyokua, “Huku ndiko kushinda kuushindako ulimwengu, hiyo imani yetu” (1 Yohana 5:4).

Ni nguvu ya aina gani huushinda ulimwengu? Ni ile imani inayomfanya Yesu kuwa Mwokozi wako binafsi—ile imani ambayo, ukiwa unatambua kushindwa kwako, kushindwa kwako kabisa kujiokoa, humshikilia msaidizi ambaye Anaweza kuokoa, kuwa tumaini lako pekee. Ni imani ambayo haitakatishwa tamaa, ambayo inaisikia sauti ya Yesu akisema, “Jipeni moyo; mimi nimeushinda ulimwengu na nguvu Yangu iliyotukuka ni yenu.” ... “Tazama, mimi nipo pamoja nanyi siku zote.”